

1607 *standis non tenerentur, attamen veterem erga gentem propensionem eo argumento probatam voluisse: sperare, additis sociorum auxiliis, facile suspiciones omnes amotum iri: bortari, suadere, ut rerum suarum tutela contenti, nihil, quo in se finitimorum arma provocent, moliantur. Tunc Salices majora exposcere: Quid opis, si ad arma ventum esset, Rhetis afferrent, flagitare: de propugnaculo adversus Fuentanam arcem exstruendo consilium atque auxilium requirere. Eodem tempore Antonius Maria Vincentius significabat, multa, quo minus perficerent ea, quibus ex pactione tenebantur, Rhætos impedire: Vulturenæ vallis præsidio militum ac præfectorum numero imminuto, quot polliciti fuerant, milites præstare non posse: majora stipendia petere; ut transitum per eorum fines concederent, concilium (quod *Pittacum* appellant) evocandum. At Salices contra Patribus affirmare, persancte Rhætos foederis pacta servaturos, transitum, licet vehementibus urgeantur officiis, concessuros. Neque minus laborabant Patres de itineribus, quibus Germani iter habituri dicebantur, obsepiendis. Propterea Ferdinandus Rubens, tormentorum præfectus, sedulo Veronensium aditus ac semitas notaverat. Ut Benaci custodia, decem longis navigiis biremibus adjectis, augeretur, sancitum. Benedictus Pisaurus Benaci præfectus lectus: Antonius quoque Landus cum summa auctoritate annonæ militaris curator in continentem missus.*

*Benedictus Pisaurus Benaci lacui præfectus.*

*Antonius Landus annonæ militaris curator.*

*Franciscus Jojeus Cardin. a Gallia Rege Venetias missus.*

Henricus de componendis Venetorum cum Pontifice controversiis vehementer sollicitus, Franciscum Jojeus Cardinalem, nobilitate, virtute, rerumque usu insignem, Venetias mittere statuit, ut ejus auctoritate aliqua concordiae ratio iniretur. Is e Gallia per Allobroges in Italiam profectus, Taurinumque in subalpinis accedens, secundo Pado Ferrariam delatus, cum ad Pappociarum vicum aliquot dies commoratus esset; de ejus adventu Patres certiores facti, ut a Fossæ Clodiæ prætore Reipublicæ nomine exciperetur, jussere. Decimosexto kalen. martii a purpuratis Senatoribus ad Sancti Spiritus fanum cum publicis navigiis obviam itum. Aedes illi, quæ olim Ferrariensium Ducum fuerant, tuncque ab Antonio Priolo, Marcio Procuratore, obtinebantur, tributæ, victus-